

吉安府志卷之三十六

附錄五

題詠

過廬陵王墓下作

謝靈運

曉月發雲陽落日次朱方含悽泛廣川灑淚眺連岡
眷言懷君子沈痛結中腸道消結憤懣運開申悲涼
神期常若存德音初不忘徂謝易永久松栢森已行
巡州協心許楚老惜蘭房解劒竟何及撫墳徒自傷
平生疑若人通蔽互相妨理感深情慟定非識所將
脆促良可哀天枉持兼常一隨往化滅安用空名揚

吉安府志

題詠

一

舉聲泣已瀝長歎不成章

於安滅荅靈運

謝宣遠

跬行安步武鏘翮周數仞豈不識高遠違方往有吝
歲寒霜雪嚴過牛路逾峻量已畏友朋勇退不敢進
行矣勵令猷寫誠酬來訊

別范安成

沈休文

平生少年日分手易前期及爾同衰暮非復別離時
勿言一樽酒明日難重持夢中不識路何以慰相思

龍溪

何敬

龍溪之山秀而峙龍溪之水清無底狂風激烈翻春
濤薄霧冥濛溢清泚奔流百折銀河通落花滾滾浮
霞紅四時佳境不可窮髣髴直與桃源同

送王牧往吉州謁使君叔

李從一

細草綠汀洲王孫耐薄游年華初冠帶文采舊弓裘
野渡花爭發春塘水亂流使君憐小阮應念倚門愁

送梁郎中赴吉州

劉長卿

渺渺雲山去幾重依依獨聽廣陵鍾明朝借問南來
客五馬雙旌何處逢

吉安府志

題詠

二

江上

時自豫章還
曲江經廬陵

張九齡

歸去南江水磷磷見底清轉逢空濶處聊繫去留情
浦樹遙如待江鷗近若迎山川別有趣况乃濯吾纓

玄潭觀

呂洞賓

褰裳攬步尋真宿清景一宵吟不足月在寒潭風在
松何必洞天三十六

玉山館

張籍

長沙新雨色如泥野水陰雲盡向西楚客天涯行已
遠山山時聽鷓鴣啼

游淨居寺

向敏中

四面煙嵐合吟魂到便清亂山供遠翠幽竹送寒聲
磬韻聽時歇雲根望處生塵機閑擺落潛得笑浮榮
萬安香城寺餞虔守趙公

周惇頤

公暇頻陪塵外遊朝天仍得送行舟軒車更共入山
脚旌旆且從留渡頭精舍泉聲清灑灑高林雲色淡
悠悠談終道奧愁言別明日瞻思上郡樓

次周茂叔

趙抃

顧我入趨堯闕去煩君出餞贛江頭更逢肅寺千山
吉安府志

題詠

三

好不惜蘭船一日留清極坐來無俗語道通何處有
離憂分攜豈用驚南北水濶風高萬木秋

陪丁元珍遊東山寺

歐陽修

幕府文書日已稀清尊歲晏喜相攜寒山帶郭穿松
路瘦馬尋春踏雪泥翠蘇蒼崖森古木綠蘿盤石暗
深溪爲貪賞物來猶早迎臘梅花吐未齊

送江公著知吉州

蘇軾

三具行盡千山水猶道匡廬更清美豈惟聖德隱狂
奴時平亦出佳公子初冠惠文讀城旦晚入奉常陪

劔履方將華省起，憚冠忽憶鈞臺歸。洗耳未應良木棄，大匠要使名駒試。千里奉親官舍當，有擇得郡江南。差可喜，白粲連檣一萬艘。紅粧執樂三千指，簿書期會得餘閑。亦念人生行樂耳。

贈永和清都觀道士童顏

蘇軾

鏡湖勅賜老江東，未似西歸玉局翁。羈枕未容春夢斷，清都宛在默存中。每逢佳境攜兒去，試問行年與我同。自笑餘生消底物，半篙清漲百灘空。

秧馬歌

蘇軾

吉安府志

題詠

四

過廬陵見宣德郎曾君安止出所作禾譜文
既溫雅事亦詳實惜其有所缺不譜農器也
予昔遊武昌見農夫皆騎秧馬以榆棗爲腹
以楸桐爲背如小舟昂其首尾背如覆瓦以
便兩髀較之偃僂而作者勞佚相半矣乃作
歌以遺曾君附禾譜之末

春雲濛濛雨淒淒，春秧欲老翠剡齊。嗟我婦女行水
泥，朝分一壠莫千畦。腰如筮篲首啄鷄，筋煩骨殆聲
酸嘶。我有桐馬手自提，頭尻軒昂腹脇低。背如覆瓦

去角圭以我兩足爲四蹄聳涌滑汰如鳧鷖纖纖束
藁亦可齋何用繁纓與月題竭從畦東走畦西山城
欲閉聞鼓鼙忽作的盧躍檀谿歸來挂壁從高栖了
無芻秣飢不啼少壯騎汝逮老鰲何曾蹶軼防顛擠
錦韉公子朝金閨笑我一生塌半犁不知自有禾馱
馱

題萬安黃公灘

蘇軾

七千里外二毛人十八灘頭一葉身山憶喜歡勞遠
夢地名惶恐泣孤臣長風送客添帆腹積雨浮舟減
吉安府志

題詠

五

志

石鱗便合與官充水手此生何止畧知津

題吉州慈恩寺神運塔

黃庭堅

十二觀音無正面誰令塔戶向東開定知四梵神通
力曾借六丁風雨推蠅說冰霜如夢寐鷄聞鍾鼓亦
驚猜從今不信維摩詰斷取三千世界來

題青原山淨居禪寺

黃庭堅

市聲固在耳一源謝塵埃乳竇響鍾磬翠峯鹿昭囿
俯看行磨蟻車馬度城隈水猶曹溪味山自思公開
浮屠涌金碧廣廈構瓌材蟬蛻三百年至今猿鳥哀

祖印平如水有句非險崖心花照十方初不落梯階
我來瞑託宿夜雨滴華榱殘僧四五輩法筵嘆塵埋
石頭麟一角道價直九垓廬陵米貴賤傳與後人猜
曉躋上方上秋旎亂基芟蓮子委箭鏃葵花仄金杯
寒藤上老木龍蛇委筋骸魯公大字石筆勢欲傾摧
德人曩來遊頗有嘉客陪憶當擁旌旗千騎相排豸
且復歌舞隨絲竹寫繁哇事如飛鴻去名與南斗偕
松風吟高丘何時更能來回首翠微合于役王事催
猿鶴一日雅重來尚徘徊

吉安府志

題詠

六

立

題海覺寺

黃庭堅

爐煙鬱鬱水沉肥水遶僧床竹遶溪一段新蟬思
柳夕陽元在綠陰西

題南塔寺

黃庭堅

薰爐茶鼎暫來同寒日鷓啼柿葉風萬事盡還盃酒
裏百年俱在大槐中

題快閣寺

黃庭堅

痴兒了却公家事快閣東西倚晚晴落木千山天遠
大澄江一道月分明朱絃已爲佳人絕青眼聊因美

酒橫萬里歸船弄長笛此心吾與白鷗盟

寄題安福李令愛竹堂

黃庭堅

淵明喜種菊子猷喜種竹託物雖自殊心期俱不俗
千載得李侯異世同風流爲官恐是陶彭澤愛竹最
知王子猷寒窓對酒聽雨雪夏簟烹茶卧風月小僧
知令不凡材自掃竹根培老節富貴於我如浮雲安
可一日無此君人言愛竹有何好此中難爲俗人道
我於此物更不踈一官窘束何由到

寄題三瑞堂

蔣之奇

吉安府志

題詠

七

立

好在廬陵守年來強健無一麾新佩印三瑞更爲圖
善政傳江右飛書到海隅緬懷烏府舊何日笑談俱
送董君登科歸永豐

梅堯臣

山東桑柘多江南松桂茂種桑待春蚕栽桂待華構
予聞雲盖下聚書爲大當徃徃見子孫緣天掇星宿
掇星星若珠光彩出屋漏秋收萬頃田作酒日爲壽
亦有千里歸錦衣行白晝

留題武功山

白玉蟾

仙境閑尋採藥翁草堂留語數宵同欲知山下雲深

處直是人間路不通泉領藕香來洞口月將松影過
溪東求名心在閒難遂明日馬蹄塵土中

經龍泉武陵瀧

周必大

人家篁竹作□□大半和烟鎖碧溪中有小桃千萬
樹開時全似武陵西

芙蓉池水接清溪晴日初乾雪後泥行過小橋驚野
鴨翩翩飛上綠楊西

遊青原山

張商英

所至紛紛簿領堆也須風月洗塵埃明朝相與尋思
吉安府志

題詠

八

胡宜

去况是同行棹臂來

噴雪泉在青原寺

胡銓

廬峯漱玉舊傳名今見青原噴雪成兩處山川肯相
下洗除塵垢一時清

題永興觀

胡銓

連雲宿麥團碧浪綴草落花成錦窠我來欲覓種桃
者獵獵空存庭下莎

寅陂行

王庭珪

陂在安成西三十里溉田萬二千畝歲久湮

塞邑貳令趙師日至始浚溪港築堤闕水灌
溉如故庭珪出城聞老農之語作寅陂行一
首以叙其事

安成城頭烏夜宿啼烏未起鷄登木傾村入城來送
君馬首肩摩袂相屬但見龐眉不識名何物老翁出
山谷老翁持酒前致詞家住西村大江曲大江兩岸
多腴田古有寅陂置官屬自從陂廢田亦荒官中無
人開舊瀆只浚故道堰橫流陂旁秔稻年年熟今年
雖旱民不憂田頭已打新春穀誰云此陂會當復老
吉安府志

題詠

九

劉二

父曾聞兩黃鵠嗟哉如君不負丞躬行阡陌勤農耕
監司項背只相望風謠滿路胡不聽胡不聽寅陂行
爲扣天闔叫一聲

題吉水崇元觀

楊萬里

贛江東來千里許流至閣前虎須怒旌陽橫劒居上
頭喝命長江教倒流跳作旋花雪山立濺得琳房滿
間濕秋來水落未足看桃花浪暖君來觀一波打窓
心膽寒

發吉州

文天祥

己卯六月初一日蒼然亭下楚囚立山河顛倒紛雨
泣乙亥七夕此何夕煌煌牛斗劍光濕戈鋌彗雲雷
電擊三百餘年火爲德須更風雨天地黑皇綱解紐
地維拆妾婦偷生自爲賊英雄扼腕怒鬚赤貫日血
忠死窮比首陽風流落南國正氣未亡人未息青原
萬丈光赫赫大江東去日夜白

青原寺二首

文天祥

鍾魚閒日月竹樹老風煙一逕溪流滿四山天影圓
無言都是趣有想便成緣夢破啼猿雨開元六百年
空庭橫蟪蛄斷碣偃龍蛇活火參禪筍清泉透佛茶
晚鐘何處雨春水滿城花夜影燈前客江西七祖家

文江五月二日

文天祥

客中端二日風雨送牢愁昨歲猶潘母今年更楚囚
田園荒吉水妻子老幽州莫作長生祝吾心在首丘

過西昌

文天祥

書生曾擁碧油幢耻與兒童對樹降漢節幾迴登快
閣楚囚今度過澄江丹心不改君臣義清淚難忘父
母邦惟恐鄉人知我瘦下帷絕粒坐蓬窓

萬安縣

文天祥

青山曲折水天平不是南征是北征舉世更無巡遠
死當年誰道甫申生遙知嶺外相思處不見灘頭惶
恐聲傳語故園猿鶴好夢回江路月風清

題歐陽文忠公祠

虞集

知公難遇已當年况復瀧岡十世阡金石舊文藏劫
火丹青遺廟祀鄉賢終身未必慚韓愈作者誰將繼
馬遷鳴鳥不聞驚歲晏長淮清潁一茫然

南野亭

虞集

吉安府志

題詠

十一

門外風塵接市廛座中春色自幽亭雲橫北極知天
□日轉東華覺地靈前澗魚遊留客釣上林鶯囀把
杯聽莫誇韋曲花無賴獨擅東南雨後青

快閣

劉崧

快閣西南引興長高城落日晚蒼涼江通牛吼疑巴
峽山入龍門似大行季子敝裘終相國長卿駟馬未
還鄉登臨口對芳樽酒莫遣秋風送綠楊

題龍城院

劉崧

天入龍城擁地靈橫岡複嶺四圍屏村原過雨春泥

紫山崦含煙野燒青火裏蓮花敷寶座雲中楊柳注
金瓶何當煮茗長松下聽講楞伽一卷經

玉華山

劉崧

翠巘千峯合丹崖一逕通樓臺上雲氣草水動天風
野曠行人外江平落鴈中傷心俯城郭烟雨正冥濛

西岩

劉崧

巖業風門口坡陀虎穴西向來梵雲寺秋草鷓鴣啼

閩川洞

劉崧

一洞深連三十里兩崖高聳百千峯溪流交路爭穿

吉安府志

題詠

十二

草日色窺林半隱松野碓春泉秋雨急土窯煉石晚
烟濃雲深不記平畚路月落時聞資福鍾

石盤嶺

劉崧

泐溪弄潺湲舉首見絕壁石脚插白沙崩崖舊時劈
始登足慄輕稍瞰心怵惕圓峯覆錡釜懸澗瀉瓴鑄
常時風雨交雲氣走霹靂兀坐蒼茫中隕然欲無敵
夤緣背前路陟巘欣後覲委蛇冠彤霞巖業掛赤霓
梯危出深窈指道轉岑寂寒葩泫零露幽翳明的礫
迂迴落坡陀清展方蹶躅喬林雜松檟玄宇紫簷滴

逝將近天人披髮調笙笛神仙豈在遠塵慮恐未滌
行歌荅清嘯次第記所歷迴風散殘雨列宿光可摘
□動亦暫休啼螿在葭菼意行得無爲念此增感激
早發文江
鮮縉

北風吹冷薄寒裘萬里遙憐上國遊雪色迷人明泊
岸江聲入夜到孤舟春歸忽聽雲霄鴈晝卧惟聞渚
水鷗不爲浮名相絆繫故園花木興悠悠

遊東華觀

鮮縉

山踞東華虎勢雄俯看城郭笑談中樓臺影倒一江
吉安府志

題詠

十三

月松檜聲傳萬壑風賓館茶煙凝座紫仙房丹火隔
窓紅素知弱水迴蓬島今日方知有路通

遊龍溪

鮮縉

龍門溪水聲珊珊魯公大筆雲綵間憑君多借幾隻
鹿待我重來騎有山

螺岡晚照

楊士奇

西望金螺峯臨夕宜返照川明天光淨瀟酒若員嵩
振衣援紫蘿凌高發清嘯解組如有期吾儕亦同調

天獄泉石

楊士奇

岩巖天獄峯高出南斗上自昔採芝翁託身此□爽
掃石看雲生吟琴苔泉響已趨金門直猶結丹霞想

石壁湖

楊士奇

危石翠如削影清澄湖波六月不知暑香風生芰荷

王仙祠

楊士奇

騎鶴去已遠庭餘昔年樹擾擾祈靈人鼓鐘動朝暮

題永豐龍潭書屋

楊士奇

開軒面澄潭潭水綠於染其下蟠蛟虬四時興有滄
嘉樹羅蔥蒨煙霞互舒斂晴漪漾春牖涼颺含暑簟

吉安府志

題詠

十四

俗轍謝經過書卷恒不掩探微心有得行素道無歉
逍遙視天宇油雲馳冉冉度跂沂上樂誰當歎與點

送四明陳侯再任吉安

楊士奇

宴罷瓊林酒一杯鞭催五馬出蓬萊金章紫綬恩重
拜皂盖朱旛喜復來帶得一天新雨露洗除九邑舊
塵埃螺川川上人千萬爭看神明太守回

石屋晴瀾

金幼孜

危石峩峩聳翠巒粼粼晴影颺層瀾四時雲氣當窓
近五月灘聲入座寒日照翠紋浮畫舫風含素練動

漁竿却懷大液恩波濶曾從鑾輿倚檻看

墨潭秋月

金幼孜

寒潭烟淨水溶溶壁月澄清映遠空素練影深涵兔魄玉盤光滿落蛟宮弄珠神女何時到解珮遊人此夕同尚想汎舟攜客處扣舷一曲對西風

登東華

劉髦

層巒華構鬱崔嵬隔水紅塵晝不來鐵笛一聲空外響月明疑是呂仙回

瑞華山

王守仁

吉安府志

題詠

十五

簿領終年未出郊此行聊解俗人嘲憂時有志懷先達作縣無能愧舊交松古尚存經雪榦竹高還長拂雲梢溪山處處堪行樂正是浮名未易拋
萬死投荒不擬回生還且復荷栽培逢時已負三年學治劇兼非百里才身可益民寧論屈志存經國未全灰正愁不是中流砥千尺狂瀾豈易摧

青原山次黃山谷韻

王守仁

咨觀歷州郡驅馳倦風埃名山特乘暇林壑盤縈回雲石緣欹逕夏木深層隈仰窮嵐霏際始睹臺殿開

衣傳西竺舊構遺唐宋材松風溪溜急湍響空山哀
妙香隱玄洞僧屋懸窮崖扳依儼龍象陟降臨緯階
飛泉瀉靈竇曲檻連雲棖我來慨遺迹勝事多湮埋
邈矣西方教流傳遍中垓如何皇極化反使吾人猜
剝陽幸未絕生意存枯芟傷心眼底事莫負生前杯
烟霞有本性山水乞歸骸崎嶇羊腸坂車輪幾傾摧
踈散麋鹿伴澗谷終追陪恬愉返真澹閬寂辭喧豗
至樂發天籟絲竹謝滛哇千古自同調豈必時代偕
珍重二三子茲遊非偶來且從山叟宿勿受役夫催

吉安府志

題詠

十六

吉

東峯上烟月夜景方徘徊

侍陽明先生游青原次韻

鄒守益

道人愛丘壑仙標絕氛埃平原與文山大字猶昭回
炯然忠義氣相照烟霞隈我行躡飛舄雲關恍洞開
深林卻炎威中有開元材板橋噴玉虹峽束湍聲哀
掃石玩急流捫蘿躡崇崖冠歌穿篁篠步滑緣松階
散日憇層樓劫火失雕棖金剛有懷滅矧復嘆沉埋
稍喜年初熟禾役擁田垓翻思在軍中梟狼正相猜
祝融似幸禍滛毒枯陳芟今日胡不樂勝境欵清杯

冲情齊寵辱達觀忘形骸由來青蚪駕羊腸豈易摧
逝將精瓊靡杖九終叅陪朝攬廬峯秀夕泛海濤厖
哿矣東山墩不離歌舞哇懷哉醒心亭幸以文詞偕
皇極平如砥車馬誰往來迷復亦已遠况乃歲月催
步趨追逸響征軸敢遲徊

武功遊機心潭及龍窟

鄒守益

石函鑿玉峽奔流大古雪下有雷霆鳴飛鳥不敢越
攀蘿往從之路滑足屢蹶斬菅坐盤石神魂自清潔
機心從何來乃爲此潭涅朗咏侑行觴不知日已沒

吉安府志

題詠

十七

吉

諸生步更健魚貫升巖峩遙尾猿猱跡直犯蛟龍窟
瀑布九天來四壁如削鐵濺注雲氣腥陰風竦毛髮
歸來手指畫霏霏如玉屑逝將洗塵慮共飽深巖蕨
靈山久有聲勝事多未發短歌挾竒踪聊用埃來哲
午日青原山中共善山晴川東廓明水諸公燕
叙
羅洪先
一徑穿雲萬木深高崖曲檻晝蕭森同心人與蘭薰
對多病身逢艾節臨自笑行踪經石滑誰從聞性辨
鐘音年來漸識窓前草不借菩提樹下陰

古佛堂

羅洪先

如何鹿苑會翻爲鷁舟催我問雙林下徒傳一偈來
蘭薰猶滿室花落自空臺度筏今何處因之覺性開

石蓮洞

羅洪先

厭從世路慎風波一瓠千金不啻過未置身名朱紱
外豈知丘壑白雲多洞疑海若開龍藏石學山魑舞
翠蘿來日大難應共惜向來踪跡轉蓬科

玄潭

羅洪先

青山隱約霧中看黃葉蕭疎夕照殘喚得漁舟來借

吉安府志

題詠

十八

吉

渡隔江人影在闌干

野竹蕭蕭水遶村柴門半掩欲黃昏鐘聲乍起林烟
合沙際漁燈照浪痕

清霜十月未沾衣碧樹高低滿翠微欲問峯頭雙劍
石舊時黃鶴傍誰飛

同中山赴會青原

聶豹

春風花柳快茲行衣帽翻令俗眼驚真樂何妨惟我
在斯人還只共心明川流不舍原無意臺鏡非空豈
有形好向就中重體會莫將沂浴混閑情

水隈山曲共行行川咏雲飛近不驚但識乾坤同父
母謾將昕夕看昏明道傳萬古無多術月映千江只
此形便是聖門真秘訣良知榛塞爲留情

神岡

劉教

百年已過半古寺作初遊蓮社何心結春山此處幽
天開千里國日湧二江流若但矜行樂談空亦外求

西峯冬至日舉惜陰會

劉教

暮雨禪房節序新古松日日長龍鱗不知陽氣回多
少悟到無生是淨因

吉安府志

題詠

十九

山中黃葉坐移時寒色依依入鬢絲一點神岡青似
黛相期只是爲相知

郭外禪林此最幽六根無染是直脩客來已自分僧
飯猶有仙帆天際頭

與東廓鄒司成登武功絕嶺

甘公亮

還舡石屋隔三秋躡景丹梯此會酬老去年華應共
惜夢中山水作真遊爐峰烟起通天白石磴雲行覺
地浮即此好觀無欲妙不須蓬海問金州

偕念菴諸公聚石屋

甘公亮

石屋茲重遊尋我花谷石細路入林深不見舊苔跡
烟霞最深處茅亭藏石隙美人占卧雲花谷呼咫尺
下有菱藕池上映青天碧朗月升梧桐舫坐遂忘夕
披襟入我懷水月二般白神化俗不分即此吾安宅

中秋神岡秀江樓
胡直

碩人邁軸傍仙臺別業峰頭挹斗台佳節喜同泉石
賞高朋還逐鴈鴻來風傳巖柱千林馥月抱江光百
里迴庾亮登臨何足擬應知人世有蓬萊

九日同楊青巖學使登白鷺洲閣 趙進美

吉安府志

題詠

二十

高秋雲物動霜城出郭餘霞映客明遠岸煙林搖夕
照微風簫鼓入江聲樽前燭冷黃花濕檻外山迴白
鳥橫欲插茱萸同北望旅懷豈爲授衣驚

春日過青原從遊者李守潘周二郡丞

曲折千巖過幽尋一徑開石林懸殿閣風磴出莓苔
澗冷微芳發天青獨鳥來梵聲隨磬落植杖更徘徊

其二

窈窕層崖外聞鍾未到門曉煙開石面春泳擁山根
幔捲雲通閣橋回樹隔村惠休誰不忝幽意一相論

其三

回徑欹斜斷長林偃翠微
近山休小隊入寺減春衣
野老來相訊沙會去自歸
傍筵雙蝶在還共雨花飛

其四

野澗通簷溜春陰覆幔坡
侵衣芳草潤穿竹暗泉過
地影涵堦細松聲接梵多
諸君興不淺吾醉亦婆娑

其五

白日石幢晚丹梯翠壁斜
一丘迷出入孤磬隱相霞
晝靜溪橋竹春濃野寺花
披襟尋薜荔隨意到棲鴉

吉安府志

題詠

二十一

登神岡山

趙進美

幽尋隨短楫江路翠微橫
飛鷺依霞遠征帆帶樹明
水雲晴入寺山氣曉浮城
農舍清沙外開林見耦耕

其二

石梁連薜荔岸幘立徘徊
地轉孤亭出沙明絕壁開
江聲二水合郡勢萬山來
祇樹聞鐘近春風淨綠苔

陪直指李公讌畢歸署車中有感 李興元

宴罷歸來夜色分
星河澹澹綴微雲
狼竿千里未全熄
犬吠萬家亦罕聞
舊市蔓荆生燕麥
荒城花草集

麋群凋殘極日猶難起慙愧龔黃二使君

秋日遊青原

鄧秉恒

風塵聊暫息攬勝到林丘樹繞精藍出山迴曲檻幽
孤亭臨絕壁衆籟逼清秋小坐滋深討玄言挹靜流

安成西里道中望武功山

羅圻彥

雲峯萬仞倚天開鬱鬱松杉望幾回鸞鶴啣花歸石
洞烟霞散彩落仙臺只因鷄肋勞塵土空羨牛衣卧
草萊今夜願從清夢裡葛翁挹袂破蒼苔

春日詣學宮時方議修造同王謹由康上若

吉安府志

題詠

二十二

感賦

羅圻彥

風吹草帶正芊芊瀟水迴環緣茆邊禹貢盡宗新玉
帛虞庠忍付舊烽煙文章欲壯宮墻望制度湏從禮
樂先自愧鳴琴逢勝友愛人學道兩茫然

螺川望青原山

王登錄

螺川東望氣猶龍嵐色參差紫碧重秀峙尋知鷓鴣
嶺峻嶒憶是駱駝峰楚聲縹緲諸天外法界蒼茫一
氣封七祖傳燈歸象罔空山千古夜聞鐘

奉侍李學憲趙兵憲李太尊公冥白鷺閣

劉愈炤

筍輿飛蓋出春城江上煙雲刺眼明躍水鷗鳧看濯
濯啼山杜宇聽聲聲馮□傑閣風堪御插漢奇峰影
亂橫會有登臨裁賦手清吟欲動斗牛驚

九日隨趙兵憲李大尊朱糧尊登青原山

劉愈炤

名勝青原夙著聞追隨杖履愧難羣山銜海氣常多
雨簾捲輕風易起雲此日登高忘主客今朝把酒問
耕耘敢將呼吸請民命大有特書郡邑文

吉安府志

題詠

二十三

登天華山次閣上趙兵憲韵 劉愈炤

積雨苦陰重登山樂曉晴逕幽疑郭遠翠滴帶江明
水落篆文細巖虛星點輕驚人存謝句搔首向天鳴
西嶽華山勝分名此地新巨靈雖未擘卷石也留春
樹古村煙合人淳香氣真願言通帝座安阜錫年頻

登白燕山時以署裁將歸 陸叢桂

出郭逢僧心已幽况餘天地此清秋閑題日日留鴻
迹古刹聲聲動鳥喉來與吉人歡短漏去携朙月上
孤舟他季夢裏尋張敏好記林邊是小樓

憶祖瑩詩 附跋

彭端吾

北古松楸老心驚雨露濡雲初千葉剩蘋藻兩沙俱
栗嶺南橫翠玉泉西繞隅慨茲龍虎穴應有鳳凰雛
先高祖銀臺公修治祖墓之後入爲京卿其於廬
陵一飯未忘也舜乾隨侍左右不啻含飴膝下作
此詩盖有觸而感焉故題曰天啓四年七月十五
日憶冷水塘祖瑩時乾孫同寓京邸之玉河橋端
吾感賦云今從文傑輩得之於匡生國材處筆墨
如新風神具在孝慈之色流溢行間重加裝潢同

吉安府志

題詠

畫像歸奉新祠世爲藏守俾後人不忘先志永念
泉隴千百世如同室信乎祖宗之靈曠代相感觀
阡表之失而復得此詩之隱而復顯良有由哉匡
與彭世同井里代有姻戚文龍輩素惟依賴國材
敦仁好義孝友無間余故書額以壽其母並以志
今昔之誼耳乾隆癸亥初夏家屏附識

修祖瑩詩 并序

彭家屏

銀臺公既修墓之後舜乾隨侍京邸賦憶祖瑩詩
以畀之余今繼修祠墓敬步原韻作修祖瑩詩留

諸祠內文龍文傑文任文富武錫其善守藏將以
示夫續我志者焉

國恩被寵渥祖澤仰沾濡川麓千重遠心神七葉俱
松楸新雨露廟寢正方隅聊此承先緒恢張待鳳雛

吉安府志卷之三十六 畢

吉安府志

題詠

二十五